

SINDICATONAN CU A LANTA DESPUES ORGANISACION DI MAESTRONAN

ORANJESTAD(AAN)-Maestronan a cuminsa ta organiza nan mes for di 1941 y a existi diferente organizacionnan cu tabata mas bien basa ariba religion. Pues por bisa cu tabatin diferente organizacion pa diferente school. Na aña 1969 a worde funda e Vereniging Leerkachten Aruba cu a agrupa mayoria di e organizacionnan.

Despues di tempo a cambia e nomber pa Sindicato di Maestronan di Aruba. SIMAR

EMPLEADONAN PUBLICO

A.N.A.A.B. a ser funda ariba 20 di Mei 1939 y manera menciona caba na su inicio no tabata funciona completamente como un sindicato pero mas bien como un club social. Ta bin cambio den esaki ora cu un grupo grandi di Arubiano ta forma parti di dirigencia di e organizacion. Y despues di tempo ta cambia e nomber pa S.E.P.A. Aruba 5 di Juli 1964 ta worde funda G.A.B.A., cual organizacion ta presenta e obreronan di gobiernu.

E nomber ta worde cambia den S.T.A. Tambe polisnan local ta forma parti di e seccion Aruba di N.A.P.B. y despues ta forma nan mesun organizacion Sindicato di Polis Arubiano SPA.

E Douaneronan tambe ta desafilía for di e organizacion Antiyanu y ta funda nan propio sindicato. Techniconan di WEB tambe ta forma nan organizacion esta V.W.A. cual despues di tempo ta worde cambia den Sindicato di W.E.B. Aruba

S.W.A..

SINDICATONAN DI SECTOR PRIVA

Na aña 1939-1940 ta tuma lugar e promer welga ariba tereno di waf y entre otro na 1955 ta bolbe bin welga. Ariba 10 di October 1960 despues di accionnan pa boycotea productonan di Republica Dominicana como protesta contra dictadura di Trujillo y un actitud anti trahador di empresanan agente di barco ta worde funda Union Portuario Arubiano UPA. Un sindicato cu den tempo di su gloria tabata tin poder y financieramente tabata para duro.

UPA tabata e promer sindicato Arubiano cu a afiliá na CLAT. Union Electricista Arubiano ta worde funda ariba 13 di Januari 1963 y ta representa trahadornan di Elmar.

Arubaanse Bond van Werknemers in Verplegende Instellingen ta worde funda dia 9 di October 1967 y ta representa trahadornan den enfermeria y na casnan di anciano.

Federacion di Trahadornan di Aruba ta worde funda ariba 22 di Juli 1964 door di dirigentenan di I.O.W.U.A. y na inicio su campo di accion tabata e trahadornan trahando pa contratistanan ariba tereno di Lago. Despues ta sigui expande pa otro sectornan y entre otro ta reemplaza Hotel Workers Union ora cu trahadornan hotelero ata dicidi di afiliá na F.T.A. na 1974.

A yega un momento cu e sindicato tabata conta cu mas

di 5000 miembro y tabata esun di mas grandi den Antiyas. F.T.A. ta presenta trahadornan den casi tur sector di e bida priva.

UNIDAD SINDICAL

Na Augustus di aña 1970 a worde funda FESINA cu afiliacion na e Central Latino Americano de Trabajadores. Intentonan promer cu esaki door di Hulandesnan pa yega na un federacion a fracasá.

Federacion di Sindicatonan Arubiano tabata agrupa mayoria di sindicatonan manera: S.N.P. - H.W.U. - G.A.B.A. - A.C.U. - A.A.U. - I.O.W.U.A. - F.T.A. - V.L.A. - U.P.A. - U.T.G.A. - A.N.A.A.B y U.E.A.

Tambe nos ta mira cu den mesun aña intentonan ta worde haci pa forma Algemene Vrije Vakvereniging Aruba, sinembargo esaki ta fracasá na aña 1972. Na aña 1975 ta inicia un proceso di

infiltracion politico den Fesina y na aña 1977 mayoria sindicato ta bandona e organizacion aki. E dos sindicatonan cu a keda afiliá te na ultimo ta F.T.A. y S.I.M.A.R.

Desde 1977 a worde papia di Sindicatonan Uni, pero pa diferencianan di principio esaki no ta concretisa. Pa un tempo cortico varios sindicato ta haya otro den Acsicom y despues den S.U.A.

Sindicatonan Uni di Aruba den cual tabata uni: SIMAR - FTA - SEPA - GABA - AVB - UEA - SPA y UPA.

Contrario na Fesina SUA no tabatin statuto, pero si un reglamento di orden cu un acuerdo di cooperacion. E unidad aki tambe a fracasá.

Ultimamente sindicatonan UPA - ABV - SIMAR - SPA - SWA y FTA a bin ta reuni y coordina posiconnan conhunto, esaki a base di igualdad, sinceridad y respet pa dirigentenan eligi door di e

miembrecia. Ta di lamenta cu awor despues cu 42 aña a pasa, dia di obrero a worde celebra pa promer biaha aki na Aruba ainda tin dirigentenan sindical cu no ta mira cu uniendo forza e trahador Arubiano ta esun cu ta sali beneficiá.

Na e momentonan aki tin den sector publico e siguiente sindicatonan: SADA - SEPA - SIMAR - SPA - STA - META/SWA.

Den sector priva: ABV - FTA - UEA y UPA.

E elementonan di inicio sindical aki a worde compila haciendo uso di:

- Aruba zoals het was zoals hete werd di Jan den Hartog
- Antilliaanse verhaal - Ted Schouten
- Arubaanse migratie - Chando Pietersz
- un paper di Gregorio Wolff
- un paper di Adelita Tromp
- un Charla di Sr. Julio Maduro